

四庫全書

史部

欽定四庫全書

五代史卷五十六

宋

歐

陽

修

撰

雜傳第四十四

和凝字成績鄆州須昌人也其九世祖逢堯為唐監察御史其後世遂不復宦學凝父矩性嗜酒不拘小節然獨好禮文士每傾貲以交之以故凝得與之遊而凝幼聰敏形神秀發舉進士梁義成軍節度使賀瓌辟為從

事瓌與唐莊宗戰于胡柳瓌戰敗脫身走獨凝隨之反顧見凝麾之使去凝曰大丈夫當為知己死吾恨未得死所爾豈可去也已而一騎追瓌幾及凝叱之不止即引弓射殺之瓌由是得免瓌歸戒其諸子曰和生志義之士也後必富貴爾其謹事之因妻之以女天成中拜殿中侍御史累遷主客員外郎知制誥翰林學士知貢舉是時進士多浮薄喜為諛譁以動主司主司每放榜則圍之以棘閉省門絕人出入以為常凝徹棘開門而

士皆肅然無譁所取皆一時之秀稱為得人晉初拜端明殿學士兼判度支為翰林學士承旨晉高祖數召之問以時事凝所對皆稱旨天福五年拜中書侍郎同中書門下平章事高祖將幸鄴而襄州安從進反迹已見凝曰陛下幸鄴從進必因此時反則將奈何高祖曰卿將何以待之凝曰先人者所以奪人也請為宣勅十餘通授之鄭王有急則命將擊之高祖以為然是時鄭王為開封尹留不從幸乃授以宣勅高祖至鄴從進果反

鄭王即以宣勅命騎將李建崇焦繼勲等討之從進謂高祖方幸鄴不意晉兵之速也行至花山遇建崇等兵以為神遂敗走出帝即位加右僕射歲餘罷平章事遷左僕射漢高祖時拜太子太傅封魯國公顯德二年卒年五十八贈侍中凝好飾車服為文章以多為富有集百餘卷嘗自鏤板以行于世識者多非之然性樂善好稱道後進之士唐故事知貢舉者所放進士以己及第時名次為重凝舉進士及第時第五後知貢舉選范質

為第五後質位至宰相封魯國公官至太子太傅皆與凝同當時以為榮焉

趙瑩字玄暉華州華陰縣人也為人純厚美風儀事梁將康延孝為從事晉高祖為保義節度使以瑩掌書記自是徙鎮常以瑩從高祖將起兵太原以問諸將吏將吏或贊成之瑩獨懼形于色勸高祖母反高祖雖不用其言心甚愛之高祖即位拜翰林學士承旨戶部侍郎同中書門下平章事累拜中書令出為晉昌軍節度使

開封尹是時出帝童昏馮玉李彥韜等用事與桑維翰  
爭權乃共譖去之以瑩柔而易制故復引以為相契丹  
滅晉瑩從出帝北徙塞外瑩事烏雲為太子太保周太  
祖時與契丹通好遣尚書左丞田敏使于契丹遇瑩于  
幽州瑩見敏悲不自勝瑩子易則易從當其徙而北也  
與易從俱而易則留事漢官至刑部郎中後瑩病將卒  
告于契丹願以尸還中國契丹許之及卒遣易從護其  
喪南歸太祖憐之贈瑩太傅葬于華陰

馮玉字璟臣定州人也少舉進士不中馮贇為河東節度使辟為推官入拜監察御史累遷禮部郎中為鹽鐵判官晉出帝納玉姊為后玉以后戚知制誥拜中書舍人玉不知書而與殷鵬同為舍人制誥常遣鵬代作頃之玉出為潁州團練使拜端明殿學士戶部侍郎遷樞密使中書侍郎同中書門下平章事是時出帝童昏馮皇后用事軍國大務一決於玉玉嘗有疾在告自刺史已上宰相不敢除授以俟玉決玉除中書舍人盧價為



工部侍郎桑維翰以價資望淺為不可由是與維翰有隙維翰由此罷相王為相四方賄賂積貲鉅萬契丹滅晉張彥澤先以兵入京師兵士爭先入王家其貲一夕而盡明日見彥澤猶謔笑自言願得持晉王璽獻契丹以冀恩獎彥澤不納出帝之北王從入契丹契丹以為太子太保周廣順三年其子傑自契丹逃歸王懼以憂卒

盧質字子微河南人也父望唐司勳郎中質幼聰慧善

屬文事唐為祕書郎丁母憂解職去後遊太原晉王以  
為河東節度掌書記質與張承業等定議立莊宗為嗣  
莊宗將即位以質為大禮使拜行臺禮部尚書莊宗即  
位欲以質為相質性疎逸不欲任責因固辭不拜拜太  
原尹北京留守遷戶部尚書翰林學士從平梁權判租  
庸遷兵部尚書後為學士承旨仍賜論思匡佐功臣天  
成元年拜匡國軍節度使三年拜兵部尚書判太常卿  
事歷鎮河陽橫海初梁已篡唐封哀帝為濟陰王既而

酖殺之瘞于曹州同光三年莊宗將議改葬而曹太后崩乃止因其故壠稍廣其封以時薦饗而已質乃建議立廟追謚謚曰昭宣光烈孝皇帝廟號景宗天成四年八月戊申明宗御文明殿遣質奉冊立廟于曹州而議者以謂輝王不幸為賊臣所立而昭宗何皇后皆為梁所弑遂以亡國而昭宣光烈非所宜稱且立廟稱宗而不入太廟皆非是共以此非質大臣亦知其不可乃奏去廟號秦王從榮坐謀反誅質以右僕射權知河南府

事廢帝反鳳翔愍帝發兵誅之竭帑藏以厚賞而兵至  
鳳翔皆叛降廢帝悉將而東事成許以重賞而軍士皆  
過望廢帝入立有司獻籍數甚少廢帝暴怒自諸鎮至  
刺史皆進錢帛助國用猶不足三司使王玫請率民財  
以佐用乃使質與玫等共議配率而貧富不均怨訟並  
起囚繫滿獄六七日間所得不滿十萬廢帝患之乃命  
質等借民屋課五月由是民大咨怨晉高祖入立質以  
疾分司西京拜太子太保卒年七十六贈太子太師謚

曰文忠

呂琦字輝山幽州安次人也父充為橫海軍節度判官  
節度使劉守文與其弟守光以兵相攻守文敗死其吏  
民立其子延祚而事之以充為謀主已而延祚又為守  
光所敗充見殺守光怒充并族其家琦年十五見執將  
就刑充故客趙玉給其監者曰此吾弟也監者信之縱  
琦去玉與琦得俱走琦足弱不能行玉負之而行逾數  
百里變姓名乞食于道以免琦為人美風儀重節槩少

喪其家游學汾晉之間唐莊宗鎮太原以為代州軍事  
推官後為橫海趙德鈞節度推官入為殿中侍御史明  
宗時為駕部員外郎兼侍御史知雜事河陽主藏吏盜  
所監物下軍巡獄獄吏尹訓納賂反其獄其冤家訴于  
朝下御史臺按驗得訓贓狀奏攝訓赴臺訓為安重誨  
所庇不與琦請不已訓懼自殺獄乃辨蒙活者甚衆歲  
餘遷禮部郎中史館修撰長興中廢帝失守河中罷居  
清化坊與琦同巷琦數往過之後廢帝入立待琦甚厚

拜知制誥給事中樞密院直學士端明殿學士是時晉高祖鎮河東有二志廢帝患之琦與李崧俱備顧問多所裨畫琦言太原之患必引契丹為助不如先事制之自明宗時王都反定州契丹遣托諾策稜等助都而為趙德鈞王晏球所敗托諾見殺策稜等皆送京師其後契丹數遣使者求策稜等其辭甚卑恭明宗輒斬其使者不報而東丹王又亡入中國契丹由此數欲求和琦因言方今之勢不如與契丹通和如漢故事歲給金帛

妻之以女使彊藩大鎮顧外無所引援可弭其亂心崧  
以琦語語三司使張延朗延朗欣然曰苟能紓國患歲  
費縣官十數萬緡責吾取足可也因共建其事廢帝大  
喜他日以琦等語問樞密直學士薛文遇文遇大以為  
非因誦戎昱社稷依明主安危託婦人之詩以誚琦等  
廢帝大怒急召崧琦等問和戎計如何琦等察帝色怒  
亟曰臣等為國計非與契丹求利於中國也帝即發怒  
曰卿等佐朕欲致太平而若是邪朕一女尚幼欲棄之



外域金帛所以養士而扞國也又輸以資敵可乎崧等  
惶恐拜謝拜無數琦足力乏不能拜而先止帝曰呂琦  
彊項肯以人主視我邪琦曰臣素病羸拜多而乏容臣  
少息頃之喘定奏曰陛下以臣等言非罪之可也屢拜  
何益帝意稍解曰勿拜賜酒一卮而遣之其議遂寢因  
遷琦御史中丞居數月復為端明殿學士其後晉高祖  
起太原果引契丹為助遂以亡唐琦事晉為秘書監累  
遷兵部侍郎天福八年卒趙玉仕至職方員外郎琦事

之如父玉疾親嘗藥扶持及卒為其家主辦喪葬玉子  
文度幼孤琦教以學如己子後舉進士及第云琦有子  
餘慶端

薛融汾州平遙人也少以儒學知名唐明宗時為右補  
闕直弘文館晉高祖鎮太原融為觀察判官高祖徙鄆  
欲據太原拒命延見賓佐問以可否而坐中或贊成之  
或恐懼不敢言融獨從容對曰融本儒生爾軍旅之事  
未嘗學也進退存亡之理宜易言哉高祖不之責也高

祖入立拜吏部郎中兼侍御史知雜事累拜左諫議大夫遷中書舍人融曰文辭非臣所長也遂辭不拜時詔修洛陽大內融上疏切諫高祖褒納其言即詔罷其後遷御史中丞改尚書右丞分司西京卒年六十

何澤廣州人也父鼎唐末為容管經略使澤少好學長於歌詩舉進士為洛陽令唐莊宗好畋獵數踐民田澤乃潛身伏草間伺莊宗當馬諫曰陛下未能一天下以休兵而暴斂疲民以給軍食今田將熟奈何恣畋游以

害多稼使民何以出租賦吏何以督民耕陛下不聽臣  
言願賜臣死於馬前使後世知陛下之過莊宗大笑為  
之止獵拜倉部郎中明宗時數上書言事明宗幸汴州  
又欲幸鄴而人情不便大臣屢言不聽澤伏閣切諫明  
宗嘉之拜吏部郎中史館修撰澤外雖直言而內實邪  
佞嘗於內殿起居班退獨留以笏叩額北望而呼曰明  
主明主聞者皆哂之五代之際民苦于兵往往因親疾  
以割股或既喪而割乳廬墓以規免州縣賦役戶部歲

給蠲符不可勝數而課州縣出紙號為蠲紙澤上書言其敝明宗下詔悉廢戶部蠲紙澤與宰相趙鳳有舊數私干鳳求為給諫鳳薄其為人以為太常少卿勅未出而澤先知之即稱新官上章自訴章下中書鳳等言澤未拜命而稱新官輕侮朝廷請坐以法乃以太僕少卿致仕居于河陽澤時年已七十尚希仕進即遣婢宜子詣匭上章言事請立秦王為皇太子秦王素驕多不軌遂成其禍由澤而始晉高祖入立名為太常少卿以疾

卒于家

王權字秀山太原人也唐左僕射起之曾孫父堯官至右司郎中權舉進士為右補闕唐亡事梁為職方員外郎知制誥翰林學士累遷御史中丞唐莊宗滅梁貶權隨州司馬起為右庶子累遷戶部尚書晉高祖時為兵部尚書是時高祖以父事契丹權當奉使歎曰我雖不才安能稽顙于穹廬乎因辭不行坐是停任踰年以太子少傅致仕卒年七十八贈左僕射

史圭常山石邑人也為人明敏好學為晉寧樂壽縣令有善政縣人立碑以頌之郭崇韜鎮成德辟為從事明宗時為尚書郎安重誨為樞密使薦圭直學士故事直學士職雖清而承領文書叅掌庶務與判官無異重誨素不知書倚圭以備顧問始白許圭升殿侍立樞密直學士升殿自主始改尚書右丞判吏部銓事重誨敗死圭出為貝州刺史罷歸常山閉門絕人事出入閭里乘輜輶車晉高祖立召拜刑部侍郎鹽鐵副使遷吏部侍

郎分知銓事有能名以疾罷卒于常山

龍敏字欲訥幽州永清人也少仕州攝叅軍劉光守亂敏避之滄州遂客于梁久不調敏素善馮道道為唐莊宗從事乃潛往依之監軍張承業謂道曰聞子有客可與俱來道以敏見承業承業辟敏監軍巡官使掌奏記莊宗即位召拜司門員外郎敏父盛式年七十餘而其祖父年九十餘皆在鄴敏乃求為興唐尹事祖父以孝聞丁母憂去職趙在禮反逼敏起視事明宗即位禮



鎮滄州敏乃復得居喪服除累拜兵部侍郎馮贇留守  
北京辟敏副留守贇入為樞密使敏拜吏部侍郎是時  
晉高祖起太原乞兵契丹唐廢帝在懷州趙德鈞父子  
有異志張敬達屯于晉安勢甚危急廢帝問計從臣敏  
曰晉所恃者契丹也東丹王失國之君今在京師若以  
兵送東丹自幽州而入西樓契丹且有內顧之憂何暇  
助晉晉失契丹大事去矣又謂李懿曰敏燕人也能知  
德鈞德鈞為將守城嬰塹篤勵健兒而已使其當大敵

奮不顧身非其能也況有異志乎今聞駕前之馬猶有  
五千願得壯者千匹健兵千人與勇將郎萬金自平遙  
汾山冒敵中而趨官砦且戰且行得其半達則事濟矣  
懿為言之廢帝廢帝莫能用然人皆壯其大言厯晉為  
太常卿使于吳越是時使吳越者見吳越王皆下拜敏  
獨揖之還遷工部侍郎乾祐元年瘍發于首卒贈右僕  
射

五代史卷五十六

欽定四庫全書

五代史卷五十七

宋

歐

陽

修

撰

雜傳第四十五

李崧深州饒陽人也崧幼聰敏能文章為鎮州參軍唐魏王繼岌為興聖宮使領鎮州節度使以推官李堯掌書記崧謂掌書呂柔曰魏王皇子天下之望書奏之職非堯所當柔私使崧代為之以示盧質馮道道等皆以

為善乃以崧為興聖宮巡官拜協律郎繼岌與郭崇韜  
伐蜀以崧掌書記繼岌已破蜀劉皇后聽讒者言陰遣  
人之蜀教繼岌殺崇韜人情不安崧入見繼岌曰王何  
為作此危事誠不能容崇韜至洛誅之何晚今遠軍五  
千里不見咫尺之詔而殺大臣動搖人情是召亂也繼  
岌曰吾亦悔之柰何崧乃召書吏三四人登樓去梯夜  
以黃紙作詔書倒用都統印明旦告諭諸軍人心乃定  
師還繼岌死於道崧至京師任圜判三司用崧為鹽鐵

判官以內憂去職還鄉里服除范延光居鎮州辟崧掌  
書記延光為樞密使崧拜拾遺直樞密院累遷戶部侍  
郎端明殿學士長興中明宗春秋高秦王從榮多不法  
晉高祖為六軍副使懼禍及求出外藩是時契丹入鴈  
門明宗選將以捍太原晉高祖欲之樞密使范延光趙  
延壽等議將久不決明宗怒甚責延壽等延壽等惶恐  
欲以康義誠應選崧獨曰太原國之北門宜得重臣非  
石敬瑭不可也由是從崧議晉高祖深德之陰遣人謝

崧曰為浮屠者必合其尖蓋欲使崧終始成已事也其  
後晉高祖以兵入京師崧竄匿伊闕民家晉高祖召為  
戶部侍郎拜中書侍郎同中書門下平章事兼樞密使  
丁內艱起復高祖崩出帝即位以崧兼判三司與馮玉  
對掌樞密是時晉兵敗契丹於陽城趙延壽在幽州詐  
言思歸以誘晉兵崧等信之初漢高祖在晉掌親軍為  
侍衛都指揮使與杜重威同制加平章事漢高祖恥之  
怒不肯謝晉高祖遣和凝諭之乃謝其後漢高祖出居

太原重威代為侍衛使崧亦數稱重威之材於是漢高祖以崧為排己深恨之崧又信延壽之詐以為然卒以重威將大兵其後敗于中渡晉遂以亡契丹耶律德光犯京師德光素聞延壽等稱崧為人及入京師謂人曰吾破南朝得崧一人而已乃拜崧太子太師契丹北還命崧以族俱行留之鎮州其後滿荅棄鎮州崧與馮道等得還高祖素不悅崧又為怨者譖之言崧為契丹所厚故崧遇漢權臣常惕惕為謙謹莫敢有所忤初漢高



祖入京師以崧第賜蘇逢吉崧家遭亂多埋金寶逢吉  
悉有之而崧弟嶼嶼與逢吉子弟同舍酒酣出怨言以  
為奪我第崧又以宅券獻逢吉逢吉尤不喜漢法素嚴  
楊邠史弘肇多濫刑法嶼僕葛延遇為嶼商賈多乾沒  
其貲嶼笞責之延遇夜宿逢吉部曲李澄家以情告澄  
是時高祖將葬睿陵河中李守貞反澄乃教延遇告變  
言崧與其甥王凝謀因山陵放火焚京師又以蠟丸書  
通守貞逢吉遣人召崧至第從容告之崧知不免乃以

幼女托逢吉逢吉送崧侍衛獄崧出乘馬從者去無一人崧恚曰自古豈有不死之人然亦豈有不亡之國乎乃自誣伏族誅崧素與翰林學士徐台符相善後周太祖立台符告宰相馮道請誅葛延遇道以延遇數經赦宥難之樞密使王峻聞之多台符有義乃奏誅延遇李鱗唐宗室子也其伯父陽事唐咸通間為給事中鱗少舉進士累不中客河朔間自稱清海軍掌書記謁定州王處直處直不為禮乃易其綠衣更為緋衣謁常山

李弘規弘規進之趙王王鎔鎔留為從事其後張文禮  
弑鎔自立遣鱗聘唐莊宗於太原鱗為人利口敢言乃  
陰為莊宗畫文禮可破之策後文禮敗莊宗以鱗為支  
使莊宗即位拜鱗宗正卿以李瓊為少卿獻祖懿祖墓  
在趙州昭慶縣唐國初建鱗瓊上言獻祖宣皇帝建初  
陵懿祖光皇帝啓運陵請置臺令縣中無賴子自稱宗  
子者百餘人宗正無譜牒莫能考按有民詣寺自言世  
為丹陽竟陵臺令厚賂宗正使鱗瓊不復詳考遂補為

令民即持絳幡招置部曲侵奪民田百餘頃以謂陵園  
墟地民訴于官不能決以聞莊宗下公卿博士問故唐  
諸帝陵寢所在公卿博士言丹陽在今潤州而竟陵非  
唐事鱗不學無知不足以備九卿坐貶司農少卿出為  
河中節度副使明宗即位以鱗故人召還累遷戶部尚  
書鱗意頗希大用嘗謂馮道趙鳳曰唐家故事宗室皆  
為宰相今天祚中興宜按舊典鱗雖不才嘗事莊宗霸  
府識今天子於藩邸論才較業何後衆人而久寘班行

於諸君安乎道等惡其言後楊溥牒者見鱗言事鱗謂  
安重誨曰楊溥欲歸國久矣若朝廷遣使諭之可以召  
也重誨信之以玉帶與牒者使為信久而無效由是貶  
鱗兗州行軍司馬鱗與廢帝有舊愍帝時為兵部尚書  
奉使湖南聞廢帝立喜以為必用已為相還過荆南謂  
高從誨曰士固有否泰吾不為時用久矣今新天子即  
位我將用矣乃就從誨求寶貨入獻以為賀從誨與馬  
紅裝拂二猱獬皮一因為鱗置酒問其副使馬承翰今

朝廷之臣孰有公輔之望承翰曰尚書崔居儉左丞姚  
顗其次太常盧文紀也從誨笑顧左右取進奏官報狀  
示鱗顗與文紀皆拜平章事矣鱗慙失色還遂獻其皮  
拂廢帝終不用初李愚自太常卿作相而盧文紀代之  
及文紀作相鱗乃求為太常卿及拜命中謝曰臣叨入  
相之資朝士傳以為笑鱗事晉累遷太子太保漢高祖  
即位拜鱗司徒居數月卒年八十八贈太傅

賈緯鎮州獲鹿人也少舉進士不中州辟參軍唐天成

中范延光鎮成德辟趙州軍事判官遷石邑令緯長於史學唐自武宗已後無實錄史官之職廢緯采次傳聞為唐年補錄六十五卷當唐之末王室微弱諸侯強盛征伐擅出天下多事故緯所論次多所闕誤而喪亂之際事迹粗存亦有補於史氏晉天福中為太常博士非其好也數求為史職改屯田員外郎起居郎史館修撰與修唐書丁內艱服除知制誥累遷中書舍人諫議大夫給事中復為修撰漢隱帝時詔與王仲寶儼等同修

晉高祖出帝漢高祖實錄初桑維翰為相常惡緯為人待之甚薄緯為維翰傳言維翰死有銀八千錠翰林學士徐台符以為不可數以非緯緯不得已更為數千錠廣順元年實錄成緯求遷官不得由是怨望是時宰相王峻監修國史緯書日歷多言當時大臣過失峻見之怒曰賈給事子弟仕宦亦要門閥奈何歷詆當朝之士使其子孫何以仕進言之高祖貶平盧軍行軍司馬明年卒于青州



段希堯河內人也晉高祖為河東節度使以希堯為判  
官高祖軍屯忻州軍中有擁高祖呼萬歲者高祖惶惑  
不知所為希堯勸高祖斬其亂首乃止高祖將舉兵於  
太原與其賓佐謀希堯以為不可高祖雖不聽然重其  
為人不之責也高祖入立希堯比諸將吏恩澤最薄久  
之稍遷諫議大夫使于吳越是時江淮不通凡使吳越  
者皆泛海而多風波之患希堯過海遭大風左右皆恐  
懼希堯曰吾平生不欺汝等恃吾可無恐也已而風亦

止厯萊懷棣三州刺史出帝時為吏部侍郎判東西銓  
事累遷禮部尚書卒年七十九贈太子少保

張允鎮州人也少事鎮州為張文禮參軍唐莊宗討張  
文禮允脫身降莊宗繫之獄文禮敗乃出之為魏州功  
曹趙在禮辟節度推官厯滄兗二鎮掌書記入為監察  
御史累遷水部員外郎知制誥廢帝皇子重美為河南  
尹掌六軍以允剛介乃拜允給事中為六軍判官罷遷  
左散騎常侍晉高祖即位屢赦天下允為駁赦論以獻

曰管子曰凡赦者小利而大害久而不勝其禍無赦者  
小害而大利久而不勝其福又漢之吳漢疾篤帝問漢  
所欲言漢曰惟願陛下無赦爾蓋行赦不以為恩不行  
赦不以為無恩罰有罪故也自古皆以水旱則降德音  
而宥過開狴牢而出囚冀感天心以救其災者非也假  
有二人之訟者一有罪而一無罪若有罪者見捨則無  
罪者嚙冤此乃致災之道非救災之術也至使小人遇  
天災則皆喜而相勸以為惡曰國將赦矣必捨我以救

災如此則是教民為惡也夫天之為道福善而禍淫若捨惡人而變災為福則是天又喜人為惡也凡天之降災所以警戒人主節嗜慾務勤儉恤鰥寡正刑罰而已是時晉高祖方好臣下有言覽之大悅允事漢為吏部侍郎隱帝誅戮大臣京師皆恐允常退朝不敢還家止于相國寺周太祖以兵入京師允匿于佛殿承塵墜而卒年六十五

王松父徽為唐僖宗宰相松舉進士後唐時歷刑部郎

中唐末從事方鎮晉高祖鎮太原辟松節度判官晉高祖即位拜右諫議大夫累拜工部尚書出帝北遷蕭翰立許王從益於京師以松為左丞相漢高祖入洛先遣人馳詔東京百官嘗授偽命者皆焚之使勿自疑由是御史臺悉斂百官偽勅焚之松以手指其脅引郭子儀自誚以語人曰此乃二十四考中書令也聞者笑之後松子仁寶為李守貞河中支使守貞反松以子故上書自陳高祖憐之但使解職而已松有田城東歲時往來

京師以疾卒

裴皞字司東河東人也裴氏自晉魏以來世為名族居  
燕者號東眷居涼者號西眷居河東者號中眷皞出於  
名家而容止端秀性剛急直而無隱少好學唐光化中  
舉進士拜校書郎拾遺補闕事梁為翰林學士中書舍  
人事後唐為禮部侍郎皞喜論議每陳朝廷闕失多斥  
權臣改太子賓客以老拜兵部尚書致仕晉高祖時起  
為工部尚書復以老告拜右僕射致仕卒年八十五贈

太子太保皞以文學在朝廷久宰相馬肩孫桑維翰皆  
皞禮部所放進士也後肩孫知舉放榜引新進士詣皞  
皞喜作詩曰門生門下見門生世傳以為榮維翰已作  
相嘗過皞皞不迎不送人或問之皞曰我見桑公於中  
書庶寮也桑公見我於私第門生也何迎送之有人亦  
以為當

王仁裕字德輦天水人也少不知書以狗馬彈射為樂  
年二十五始就學而為人雋秀以文辭知名秦帥辟為

秦州節度判官秦州入于蜀仁裕因事蜀為中書舍人翰林學士唐莊宗平蜀仁裕事唐復為秦州節度判官王思同鎮興元辟為從事思同留守西京以為判官廢帝舉兵鳳翔思同戰敗廢帝得仁裕聞其名不殺寘之軍中自廢帝起事至其入立馳檄諸鎮詔書誥命皆仁裕為之以都官郎中充翰林學士晉高祖入立罷職為郎中歷司封左司郎中諫議大夫漢高祖時復為翰林學士承旨累遷戶部尚書罷為兵部尚書太子少



保顯德三年卒年七十七贈太子少師仁裕性曉音律  
晉高祖初定雅樂宴羣臣於永福殿奏黃鍾仁裕聞之  
曰音不純肅而無和聲當有爭者起於禁中已而兩軍  
校鬪昇龍門外聲聞于內人以為神喜為詩其少也嘗  
夢剖其腸胃以西江水滌之顧見江中沙石皆為篆籀  
之文由是文思益進乃集其平生所作詩萬餘首為百  
卷號西江集仁裕與和凝於五代時皆以文章知名又  
嘗知貢舉仁裕門生王溥凝門生范質皆至宰相時稱

其得人

裴羽字用化其父贄相唐僖宗官至司空羽以一品子為河南壽安尉事梁為御史臺主簿改監察御史唐明宗時為吏部郎中與右散騎常侍陸崇使于闐為海風所颺至錢塘是時吳越王錢鏐與安重誨有隙唐方絕鏐朝貢羽等被留經歲而崇以疾卒後鏐遣羽還羽求載崇尸與俱歸鏐初不許羽以語感動鏐乃惻然許之因附羽表自歸明宗得鏐表大喜由是吳越復通於中

國羽護崇喪至京師及其橐裝還其家士人皆多羽之  
義羽周太祖時為左散騎常侍卒贈戶部尚書

王延字世美鄭州長豐人也少好學嘗以賦謁梁相李  
琪琪為之稱譽薦為即墨縣令馮道作相與延故人召  
拜左補闕遷水部員外郎知制誥拜中書舍人權知貢  
舉吏部尚書盧文紀與故相崔協有隙是時協子頤方  
舉進士文紀謂延曰吾嘗譽子于朝貢舉選士當求實  
效無以虛名取人昔有越人善泗生子方晬其母浮之

水上人怪而問之則曰其父善泗子必能之若是可乎  
延退而笑曰盧公之言為崔協也恨其父遂及其子邪  
明年選頎甲科人皆稱其公累遷刑部尚書以太子少  
保致仕卒年七十三延為人重然諾與其弟規相友愛  
五代之際稱其家法焉

馬重績字洞微其先出於北狄而世事軍中重績少學  
數術明太一五紀八象三統大厯居于太原唐莊宗鎮  
太原每用兵征伐必以問之重績所言無不中拜大理

司直明宗時廢不用晉高祖以太原拒命廢帝遣兵圍之勢甚危急命重績筮之遇同人曰天火之象乾健而離明健者君之德也明者南面而嚮之所以治天下也同人者人所同也必有同我者焉易曰戰乎乾乾西北也又曰相見乎離離南方也其同我者自北而南乎乾西北也戰而勝其九月十月之交乎是歲九月契丹助晉擊敗唐軍晉遂有天下拜重績太子右贊善大夫遷司天監明年張從賓反命重績筮之遇隨曰南瞻析木

木不自續虛而動之動隨其覆歲將秋矣無能為也七月而從賓敗高祖大喜賜以良馬器幣天福三年重續上言厯象王者所以正一氣之元宣萬邦之命而古今所紀考審多差宣明氣朔正而星度不驗崇玄五星得而歲差一日以宣明之氣朔合崇玄之五星二厯相參然後符合自前世諸厯皆起天正十一月為歲首用太古甲子為上元積歲愈多差濶愈甚臣輒合二厯創為新法以唐天寶十四載乙未為上元雨水正月中氣為

氣首詔下司天監趙仁琦張文皓等考覆得失仁琦等  
言明年庚子正月朔用重績厯考之皆合無舛乃下詔  
班行之號調元厯行之數歲輒差遂不用重績又言漏  
刻之法以中星考晝夜為一百刻八刻六十分刻之二  
十為一時時以四刻十分為正此自古所用也今失其  
傳以午正為時始下侵未四刻十分而為午由是晝夜  
昏曉皆失其正請依古改正從之重績卒年六十四

趙延義字子英秦州人也曾祖省躬通數術避亂于蜀

父溫珪事蜀王建為司天監每為建占吉凶小不中輒  
加詰責溫珪臨卒戒其子孫曰數術吾世業然吾仕亂  
國得罪而幾死者數矣子孫能以佗道仕進者不必為  
也然延義少亦以此仕蜀為司天監蜀亡仕唐為星官  
延義兼通三式頗善相人契丹滅晉延義隨虜至鎮州  
李筠白再榮謀逐滿達歸漢猶豫未決延義假述數術  
贊成之周太祖自魏以兵入京師太祖召延義問漢祚  
短促者天數邪延義言王者撫天下當以仁恩德澤而



漢法深酷刑罰枉濫天下稱冤此其所以亡也是時太祖方以兵圍蘇逢吉劉銖第欲誅其族聞延義言悚然因貸其族二家獲全延義事周為太府卿判司天監以疾卒

五代史卷五十七

欽定四庫全書

五代史卷五十八

宋

歐

陽

修

撰

嗚呼五代禮樂文章吾無取焉其後世有必欲知之者  
不可以遺也作司天職方考

司天考第一

司天掌日月星辰之象周天一歲四時二十四氣七十  
二候行十日十二辰以為厯而謹察其變者以為占占

者非常之兆也以驗吉凶以求天意以覺人事其術藏於有司歷者有常之數也以推寒暑以先天道以勉人事其法信於天下術有時而用法不可一日而差毫釐則亂天人之序乖百事之時蓋有國之所重也然自堯命羲和見於書中星閏餘略存其大法而三代中間千有餘歲遺文曠廢六經無所述而孔子之徒亦未嘗道也至於後世其學一出於陰陽之家其事則重其學則末夫天人之際遠哉微矣而使一藝之士布算積

分上求數千萬歲之前必得甲子朔旦夜半冬至而日月五星皆會于子謂之上元以為厯始蓋自漢而後其說始詳見於世其源流所自止於如此是果堯舜三代之法歟皆不可得而考矣然自是以來厯家之術雖世多不同而未始不本於此五代之初因唐之故用崇玄厯至晉高祖時司天監馬重績始更造新厯不復推古上元甲子冬至七曜之會而起唐天寶十四載乙未為上元用正月雨水為氣首初唐建中時術者曹士為始

變古法以顯慶五年為上元雨水為歲首號符天曆然  
世謂之小曆祇行於民間而重續乃用以為法遂施于  
朝廷賜號調元曆然行之五年輒差不可用而復用崇  
玄曆周廣順中國子博士王處訥私撰明玄曆于家民  
間又有萬分曆而蜀有永昌曆正象曆南唐有齊政曆  
五代之際曆家可考見者止於此而調元曆法既非古  
明玄又止藏其家萬分止行於民間其法皆不足紀而  
永昌正象齊政歷皆止用於其國今亦亡不復見世宗

即位外伐僭叛內修法度端明殿學士王朴通於歷數  
乃詔朴撰定歲餘朴奏曰臣聞聖人之作也在乎知天  
之變者也人情之動則可以言知之天道之動則當以  
數知之數之為用也聖人以之觀天道焉歲月日時由  
斯而成陰陽寒暑由斯而節四方之政由斯而行夫為  
國家者履端立極必體其元布政考績必因其歲禮動  
樂舉必正其朔三農百工必順其時五刑九伐必順其  
氣庶務有為必從其日月是以聖人受命必治歷數故

五紀有常度庶幾有常應正朔行之於天下也自唐之季凡歷數朝亂日失天垂將百載天之歷數汨陳而已陛下順考古道寅畏上天咨詢庶官振舉墜典臣雖非能者敢不奉詔乃包萬象以為法齊七政以立元測圭箭以候氣審臍胸以定朔明九道以步月校遲疾以推星考黃道之斜正辨天勢之昇降而交蝕詳焉夫立天之道曰陰與陽陰陽各有數合則化成矣陽之策三十六陰之策二十四奇偶相命兩陽三陰同得七十二何

則陰陽之數合七十二者化成之數也化成則謂之五行之數五行之得暮數過之者謂之氣盈不及者謂之朔虛至於應變分用無所不通故以七十二為經法經者常用之法也百者數之節也隨法進退不失舊位故謂之通法以通法進經法得七千二百謂之統法自元入經先用此法統歷之諸法也以通法進統法得七千二萬氣朔之下收分必盡謂之全率以通法進全率得七千二百萬謂之大率而元紀生焉元者歲月日時皆



甲子日月五星合在子當盈縮先後之中所謂七政齊  
矣古者植圭於陽城以其近洛也蓋尚憚其中乃在洛  
之東偏開元十二年遣使天下候影南距林邑北距橫  
野中得浚儀之岳臺應南北弦居地之中大周建國定  
都於汴樹圭置箭測岳臺晷漏以為中數晷漏正則日  
之所至氣之所應得之矣日月皆有盈縮日盈月縮則  
後中而朔月盈日縮則先中而朔自古朏朧之法率皆  
平行之數入歷既有前次而又衰稍不倫皇極舊術則

迂迴而難用降及諸歷則踈遠而多失今以月離朏朧  
隨歷校定日躔朏朧臨用加減所得者入離定日也一  
日之中分為九限每限損益衰稍有倫朏朧之法可謂  
審矣赤道者天之絃帶也其勢圓而平紀宿度之常數  
焉黃道者日軌也其半在赤道內半在赤道外去極二  
十四度當與赤道近則其勢斜當與赤道遠則其勢直  
當斜則日行宜遲當直則日行宜速故二分前後加其  
度二至前後減其度九道者月軌也其半在黃道內半

在黃道外去極遠六度出黃道謂之正交入黃道謂之  
中交若正交在秋分之宿中交在春分之宿則比黃道  
益斜若正交在春分之宿中交在秋分之宿則比黃道  
反直若正交中交在二至之宿則其勢差斜故校去二  
至二分遠近以考斜正乃得加減之數自古雖有九道  
之說蓋亦知而未詳徒有祖述之文而無推步之用今  
以黃道一周分為八節一節之中分為九道盡七十二  
道而使日月無所隱其斜正之勢焉九道之法可謂明

矣星之行也近日而疾遠日而遲去日極遠勢盡而留  
自古諸歷分段失實隆降無準今日行分尚多次日便  
留自留而退惟用平行仍以入段行度為入歷之數皆  
非本理遂至乖戾今校逐日行分積以為變段然後自  
疾而漸遲勢盡而留自留而行亦積微而後多別立諸  
段變歷以推變差俾諸段變差際會相合星之遲疾可  
得而知之矣自古相傳皆謂去交十五度以下則日月  
有蝕殊不知日月之相掩與闇虛之所射其理有異今

以日月經度之大小校去交之遠近以黃道之斜正天勢之昇降度仰視旁視之分數則交虧得其實矣臣考前世無食神首尾之文近自司天卜祝小術不能舉其大體遂為等接之法蓋從假用以求徑捷於是乎交有逆行之數後學者不能詳知因言歷有九曜以為注歷之常式今並削而去之謹以步日步月步星步發斂為四篇合為歷經一卷歷十一卷草三卷顯德三年七政細行歷一卷以為欽天歷昔在帝堯欽若昊天陛下考

歷象日月星辰唐堯之道也天道玄遠非微臣之所盡  
知世宗嘉之詔司天監用之以明年正月朔旦為始

顯德欽天歷

演紀上元甲子距今顯德三年丙辰積七千二百六十  
九萬八千四百五十二算外

欽天統法七千二百

欽天經法七十二

欽天通法一百

欽天步日躔術

歲率二百六十二萬九千七百六十 四十

軌率二百六十二萬九千八百四十四 八十

朔率二十一萬二千六百二十 二十八

歲策三百六十五 一千七百六十 四十

軌策三百六十五 一千八百四十四 八十

歲中一百八十二 四千四百八十 二十

軌中一百八十二 四千五百二十二 四十

朔策二十九

三千八百二十

二十八

氣策一十五

一千五百七十三

三十五

象策七

一千七百五十五

七

周紀六十

歲差八十四

四十

辰則六百

八刻二十四分

赤道宿次

斗二十六度牛八度女十二度虛一十度少危十七度

室十六度壁九度



北方七宿九十八度少

奎十六度婁十二度胃十四度昂十一度畢十七度觜  
一度參一十度

西方七宿八十一度

井三十三度鬼三度柳十五度星七度張十八度翼十  
八度軫十七度

南方七宿一百一十一度

角十二度亢九度氐十五度房五度心五度尾十八度

箕十一度

東方七宿七十五度

中節

置歲率以演紀上元距所求積年乘之為氣積統法而  
一為日盈周紀去之命甲子算外即天正中氣日辰及  
分秒也以氣策累加之秒盈通法從分分盈統法從日  
日盈周紀去之即各得次氣日辰及分秒也

朔弦望

置氣積以朔率去之不盡為閏餘用減氣積為朔積統法而一為日盈周紀去之命甲子算外即天正常朔日辰及分秒也以象策累加之即各得弦望及次朔也

日躔入厯

置歲率以閏餘減之統法而一為日歲中以下為盈以上減去歲中為縮即天正常朔加時所入也累加象策滿歲中去之盈縮互命即四象所入也

日躔朏朧

置加時入厯分秒以其日損益率乘之統法而一損益其日朧胸數為日躔朧胸定數

赤道日度

置氣積以軌率去之餘統法而一為度命赤道虛八算外即天正中氣加時日躔赤道宿度及分秒也加歲中以次命之即夏至之宿也

黃道宿次

置二至日躔赤道宿度距前後每五度為限初率八每

限減一盡九限末率空乃一度少彊亦限率空其半當  
四立之宿自後亦五度為限初率空每限增一盡九限  
末率八殷二分之宿自二分至二至亦如之各以限率  
乘所入限度為分經法而一為度二至前後各九限以  
減二分前後各九限以加赤道宿為黃道宿及分就其  
分為少大半之數

黃道日度

置天正中氣加時日躔赤道宿度各與所入限率相乘

皆以統法通之以所入限率乘其分以從之經法而一  
為分盈統法為度用減赤道所躔即天正中氣加時日  
躔黃道宿度及分也加歲中以黃道宿次命之即夏至  
加時日度及分也

午中日躔

置二至分減去半法為午後分不足反減為午前分以  
乘初日躔分經法而一午前以加午後以減加時黃道  
日度為午中日度及分也各以次日躔分加之滿統法

從度依宿次命之即次日午中日躔也

午中日躔入歷

置天正中氣午前分便為午中入盈歷日分其在午後者以午後分減歲中為午中入縮歷日分累加一日滿歲中即去之盈縮互命為每日午中入歷也

岳臺中晷

置午中入歷分以其日損益率乘之加統法而一為分分十為寸用損益其下中晷數為定數也

晨昏分

各置入歷分以其日損益率乘之加統法而一用損益其下晨分即所求晨定分也用損加益減其下昏分即所求昏定分也

日出入辰刻

置晨昏分以一百八十加晨減昏為日出入分各以辰則除為辰數餘滿經法為刻命辰數子正算外則日出入辰刻也



晝夜刻

置日入分以日出分減之為晝分用減統法為夜分各滿經法為晝夜刻

五夜辰刻

置昏分以辰則除為辰數經法除為刻數命辰數子正算外即甲夜辰刻也倍晨分五約之為更用分又五約之為籌用分用累加甲夜滿辰則為辰滿經法為刻即各得五夜辰刻也

昏曉中星

置昏分減去半統用乘軌率統法除之為距中分盈統法為度加午中日躔為昏中星減之為曉中星

赤道內外數

置入歷分以其日損益率乘之加統法而一用損益其下內外數如不足損則反損之內外互命即得所求赤道內外定數也

九服距軌數

置距岳臺南北里數以三百六十通之為步一千七百五十六除之用北加南減二千五百一十三為其地戴中數以赤道內外定數內減外加之即九服距軌數也

九服中晷

置距軌數二十五乘之一百三十七除為天用分置之  
以二十二乘六約之用減四千為晷法又以天用分自  
相乘如晷法而一為地用分相從為晷分分十為寸即  
得其地中晷也

## 九服刻漏

經法通軌中而半之用自相乘如其地戴中數而一以乘二百六十三經法除之為漏法通軌中於上置赤道內外數於下以下減上餘用乘之盈漏法為漏分赤道內以減赤道外以加一千六百二十為其地晨分減統法為昏分置晨昏分各如岳臺術入之即得其地日出入辰刻五夜辰刻昏曉中星也

欽天步月離術

離率一十九萬八千三百九十三 九

交率一十九萬五千九百三十七 九十七 五十六

離策二十七 三千九百九十三 九

交策二十七 一千五百二十七 九十七 五十六

望策一十四 五千五百一十 一十四

交中一十三 四千三百六十三 九十八 七十八

離朔一 七千二十七 一十九

交朔二 二千二百九十二 三十二 四十四

中準一千七百三十六

中限四千七百八十

平離九百六十三

程節八百

月離入歷

置朔積以離率去之餘滿統法為日即天正常朔加時入歷也累加象策盈離策去之即弦望及次朔入歷也

月離朏朧

置入歷分以日躔朧朧定數朧減朧加之程節除之為限數餘乘所入限損益率程節而一用損益其限朧朧為定數

朔弦望定日

各以日躔月離朧朧定數朧減朧加朔弦望常分為定日定朔加時日入後則進一日有交見初則不進弦望加時日未出則退一日日雖出有交見初亦如之元日有交則消息定之定朔與後朔不同者大不同者小無

中氣者為閏

朔望加時日度

各置日躔入歷以日躔月離朏朒定數朏減朒加之為定朔加時入歷以歷分乘其日損益率統法而一損益其下盈縮數為定數置定朔歷分通法約之以定數盈加縮減之各命以冬至夏至之宿算外即所求也

月離入交

置朔積以交率去之餘滿統法為日即天正常朔入交



泛日也以望策累加之盈交策去之即望及次朔所入也各以日躔朧朧定數朧減朧加之為入交常日置月離朧朧定數經法乘之平離而一朧減朧加常分即入交定日也

黃道正交月度

統法通朔交定日以二百五十四乘之十九而一復以統法除為入交度用減其朔加時日度即朔前月離正交黃道宿度也

# 九道宿次

月離出入黃道六度變從八節斜正不同故月有九道黃道八節各有九限若正交起八節後第一限之宿為月行其節第一道起第二限之宿為月行其節第二道即以所起限為正交後第一限初率八每限減一盡九限末率空又九限初率空每限增一末率八殷半交之宿自後亦九限初率八每限減一末率空又九限初率空每限增一末率八復與黃道相會謂之中交自中交

至正交亦如之各置所入限度以限率乘之為泛差其  
正交中交前後各九限以距二至之宿限數乘之半交  
前後各九限以距二分之宿限數乘之皆如經法而一  
為黃道產在冬至之宿後正交前後各九限為減中交  
前後各九限為加在夏至之宿後正交前後各九限為  
加中交前後各九限為減凡月正交後出黃道外中交  
後入黃道內其半交前後各九限在春分之宿後出黃  
道外秋分之宿後入黃道內皆以差為加在春分之宿

後入黃道內秋分之宿後出黃道外皆以差為減四約  
泛差以黃道差減之為赤道差正交中交前後各九限  
皆以差為加半交前後各九限皆以差為減以黃赤二  
差加減黃道為九道宿次就其分為少太半之數八節  
各九道七十二道周焉

九道正交月度

置月離正交黃道宿度各以所入限率乘之亦乘其分  
經法約之為泛差用求黃赤二差以加減之即月離正

交九道宿度也

九道朔月度

置月離正交九道宿度以入交度加之命以九道宿次即其朔加時月離九道宿度也

九道望月度

置朔望加時日相距之度以軌中加之為加時象積用加其朔九道月度命以其道宿次即所求也自望推朔亦如之

月離午中入歷

置朔望月離入歷加半統減去定分各以日躔月離朏  
朒定數朏減朒加之即所求也

晨昏月度

置其日晨昏分以定分減之為前不足返減為後用乘  
其日離程統法而一滿經法為度為晨昏前後度前加  
後減加時月為晨昏月度

晨昏象積

置加時象積以前象前後度前減後加又以後象前後度前加後減之即所求也

每日晨昏月度

累計距後象離度以減晨昏象積為加不足反減之為減以距後象日數除之用加減每日離度為定度累加晨昏月度命以九道宿次即所求也

月去黃道度

置入交定日交中以下月行陽道以上去之月行陰道

皆以經法通之用減九百八十餘以乘之五百五十六而一為分滿經法為度行陽道在黃道外行陰道在黃道內即所求月去黃道內外度也

日月食限

置定交行陰陽道日半交中以下為交後以上用減交中為交前皆以統法通之為距交分朔視距交分陽道四千三百一十九陰道一萬三百八十三以下日入食限望視距交分陰陽道皆六千九百九十五以下月入



食限

日月食甚加時定分

置朔定分半統以上以半統減之半統以下用減半統  
為距午分十一乘之經法而一半統以下減半統以上  
加之朔定分為日食加時定分望以其日晨分與一千  
六百二十相減餘以二百四十五乘之三百一十三而  
一用減二百四十五餘以損益望定分為月食加時定  
分

日食常準

置中準與其日赤道內外數相乘二千五百一十三除為黃道出入食差以距午分減半晝分以乘之半晝分而一赤道內以減赤道外以加中準為日食常準

日食定準

置日躔入歷以經法通之三千二百八十七以下用減三千二百八十七為二至後以上減去三千二百八十七為二分前六千五百七十四以上用減九千八百六

十一為二分後以上減去九千八百六十一為二至前  
各三約之二至前後用減二分前後用加二千七百七  
十二為黃道斜正食差以距午分乘之半畫分而一以  
加常準為定準

日食分

以定準加中限為陰道定準減中限為陽道定限不足  
減者反減之為限外分視陰道距交分定準以上定限  
以下為陰道食即置定限以距交分減之為距食分定

準以下雖曰陰道亦為陽道食即加陽道定限為距食分其有限外分者即減去限外分為距食分不足減者不食其陰道距交分定限以下為入定食限即用減陽道定限為距食分各置距食分皆以四百七十八除為日食之大分餘為小分命大分以十為限命小分以半及彊弱

月食分

視距交分中準以下皆既以上用減食限為距食分置

之以五百二十六除為月食之大分餘為小分命大分以十為限命小分以半及彊弱

日食泛用分

置距食分一千九百一十二以上用減四千七百八十餘自相乘六萬三千二百七十二除之以減六百四十七為泛用分九百五十六以上用減一千九百一十二餘以通法乘之七百三十五而一以減五百一十七為泛用分九百五十六以上以距食分自相乘二千三百

六十二除之用減三百八十七為泛用分

月食泛用分

置距食分二千一百四以上用減五千二百六十餘自相乘六萬九千一百六十九除之以減七百一十一為泛用分一千五十二以上用減二千一百四十餘七除之以減五百六十七為泛用分一千五十二以下以距食分減之餘自相乘二千六百五十四而一用減四百一十七為泛用分

日月初末加時定分

各置泛用分以平離乘之其日離程而一為定用分以減朔望定分為虧初加之為復末加時常分如食甚術推之得虧初復末定分置初甚末定分各以辰則除之為辰經法除之為刻即初甚末之辰刻也

虧食所起

日食起虧自西月食起虧自東其食分少者月行陽道則日食偏南月食偏北陰道則日食偏北月食偏南此

常數也立春後立夏前食分多則日食偏南月食偏北  
立秋後立冬前食分多則日食偏北月食偏南此黃道  
斜正也陽道交前陰道交後食分多則日食偏南月食  
偏北陽道交後陰道交前食分多則日食偏北月食偏  
南此九道斜正也黃道比常數所偏差少九道比黃道  
所偏又四分之一皆據午而言之若午前午後一理偏  
南一理偏北及消息所食分數多少以定初甚末之方  
即各得所求也



帶食出入分

視其日出入分在虧初定分已上復末定分已下即帶食出入食甚在出入分已下者以出入分減復末定分為帶食差食甚在出入分已上者以虧初定分減出入分為帶食差各置帶食差以距食分乘之定用分而一日以四百七十八月以五百二十六除為帶食之大分餘為小分

食入更籌

各置初甚末定分晨分已下以晨分加之昏分已上以昏分減之皆更用分而一為更數餘籌用分而一為籌數

欽天步五星術

歲星

周率二百八十七萬一千九百七十六 六

變率二百四萬二千二百一十五 六十六

歷率二百六十二萬九千九百六十六 七十八

周策三百九十八 六千三百七十六 六

歷中一百八十二 四千四百八十 八十九

變段 變日 變度 變歷

晨見 一十七 三十三 二四

順疾 九十 一十六 一十一

順遲 二十五 二九 一九

前留 二十六 三十

退遲 一十四 一二十 空 二十

退疾

二十七

四  
八十

一  
七十

退疾

二十七

四  
八十

一  
七十

退遲

一十四

一  
二十

空  
二十

後留

二十六  
三十

順遲

二十五

二  
九

一  
二十

順疾

九十

一十六  
六十  
一十一  
一十

夕伏

一十七

三  
三十

二  
四十

熒惑

周率五百六十一萬五千四百二十二 一十一

變率二百九十八萬五千六百六十一 七十一

歷率二百六十二萬九千七百六十 空

周策七百七十九 六千六百二十二 一十一

歷中一百八十二 四千四百八十 空

變改 變日 變度 變歷

晨見 七十三 五十三<sub>六十</sub> 五十五<sub>八十</sub>

順疾 七十三 五十一<sub>一</sub> 四十八<sub>三</sub>

次疾

七十一

四十六

九六十

四十四

一十六

次遲

七十一

四十五

三十三

四十二

五十八

順遲

六十二

一十九

九二十一

一十八

二十

前留

八十六

九

退遲

一十

一五十

空

四十

退疾

二十一

七

四十六

二

四十

退疾

二十一

七

四十六

二

四十

退遲

一十

一

五十

空

四十

後留

八十六  
九

順遲

六十二  
一十九  
九  
二十一  
十八  
二十

次遲

七十一  
四十五  
三  
三  
三  
四十二  
八  
五十

次疾

七十一  
四十六  
九  
六  
十  
四十四  
七  
一  
十

順疾

七十三  
五十一  
一  
四十八  
三

夕伏

七十三  
五十三  
六  
十  
八  
五  
十  
八

鎮星

周率二百七十二萬二千一百七十六  
九十

變率九萬二千四百一十六

五十

歷率二百六十二萬九千七百五十九

八十

周策二百七十八 五百七十六

九十

歷中一百八十二 四千四百七十九

九十

變段

變日

變度

變歷

晨見

一十九

二十七

一十四

順疾

六十五

六十八

三十五

順遲

一十九

空三十

空三十



前留

三十七 三

退遲

一十六

空

三四十

空

四一十

退疾

三十三

二

五三十

空

十六

退疾

三十三

二

五三十

空

十六

退遲

一十六

空

三四十

空

四一十

後留

三十七

三

順遲

一十九

空

三六十

空

五三十

順疾

六十五

六

八三十

三

一五十

夕伏

一十九

二七

一  
四一十

太白

周率四百二十萬四千一百四十三

九十六

變率四百二十萬四千一百四十三

九十六

歷率二百六十二萬九千七百五十三

五十六

周策五百八十三 六千五百四十三

九十六

歷中一百八十二 四千四百七十五

二十八

變段

變日

變度

變歷

夕見

四十二

五十三

十四

五十一

一十七

順疾

九十六

一百二十一

七十五

一百一十六

九十

次疾

七十三

八十三

七十三

七十七

二

次遲

三十三

三十四

三十二

十四

順遲

二十四

一十一

一十六

一十一

四十二

前留

六

九十六

退遲

四

一

二十

空

一三十

退疾

六

三

五六十

一

二十

夕伏

七

四  
一四十

一  
七三十

晨見

七

四  
四十四

一  
七三十

退疾

六

三  
五六十

一  
二十

退遲

四

一  
二十

空  
一三十

後留

六  
九六十

順遲

二十四

一十一  
一六十  
一十一  
二十

次遲

三十三

三十四  
一  
三十二  
二十四

次疾

七十三

八十三  
七  
七十七  
一

順疾

九十六

一百二十一

五十七

一百一十六

三十九

晨伏

四十二

五十三

十四

五十一

一十七

辰星

周率八十三萬四千三百三十五

五十二

變率八十三萬四千三百三十五

五十二

歷率二百六十二萬九千七百六十

四十四

周策一百一十五 六千三百三十五

五十二

歷中一百八十二 四千四百八十

二十二

變段

變日

變度

變歷

夕見

一十七

三十四

二十九

四十

順疾

一十七

一十八

四十二

一十六

四

順遲

一十六

三十四

一十一

三十四

一十一

前留

二六

十八

夕伏

一十一

六

二

晨見

一十一

六

二

後留

二六

十八

順遲

一十六

三十四

一十一

二十四

一十一

十一

順疾

一十一

一十八

四十二

一十六

四

晨伏

一十七

三十四

一

二十九

四十五

中日中星

置氣積以其星周率除之為周數不盡為天正中氣積  
前合用減歲率為前年天正中氣後合如不足減則加  
歲率以減之為次前年天正中氣後合各以統法約之  
為日為度即所求平合中日中星也置中日以逐段變

日累加之即逐段中日也置中星以逐段變度順加退減之即得逐段中星金水夕伏晨見皆退變也

### 入歷

置變率以周數乘之以歷率去之餘滿統法為度歷中以下為先以上減去歷中為後即所求平合入歷以逐段變歷累加之得逐段入歷也

### 先後定數

置入歷分以其度損益率乘之經法而一用損益其下



先後數即所求也

常日定星

置中日中星各以先後定數先加後減之留用前段先後數太白順伏見及前順疾次疾後次遲次疾辰星順伏見及前疾後遲並先減後加之即各為其段常日定星置定星以其年天正中氣日躔黃道宿次加而命之得逐段末日加時宿度也

盈縮定數

置常日如歲中以下為在盈以上減去歲中餘為在縮  
即常日入盈縮歷也置歷分以其日損益率乘之經法  
而一用損益其下盈縮數即得所求也

### 定日

置常日以盈縮定數盈減縮加之為定日以其年天正  
中氣加而命之即逐段末日加時日辰也

### 入中節

置定日以氣策除之命起冬至即所入氣日數也

平行分

置定日以前段定日減之為日率定星與前段定星相減為度率通度率以經法乘之通日率而一為平行分

初末行分

近伏段與伏段平行分合而半之為其段近伏行分以平行分減之餘減平行分為其段遠伏行分近留段近留行分空倍平行分為其段遠留行分其不近伏留段皆以順行二段平行分合而半之為前段末日後段初

日行分各與其段平行分相減平行分多則加平行分  
平行分少則減平行分即前段初日後段末日行分其  
不近伏留段退行則以遲段近疾行分為疾段近遲行  
分所得與平行分相減平行分多則加之少則減之皆  
為遠遲行分也

初行夜半宿次

置經法以前段末日加時分減之餘乘前段末日行分  
經法而一用順加退減前段末日加時宿度為其段初

行昏後夜半宿度也

每日行分

初末行分相減為差率累計其段初行昏後夜半距後段初行昏後夜半日數除之為日差半日差以減多加少為其段初末定行分置初定行分用日差末多則累加末少則累減為每日行分以每日行分順加退減初行昏後夜半宿度為每日昏後夜半星所至宿度也

先定日昏後夜半宿次

自初日累計距所求日數以乘其段日差末多用加末  
少用減初日行分爲其日行分合初日而半之以所累  
計日乘之用順加退減其段初行昏後夜半宿次即所  
求也

欽天步發斂術

候策五

五百二十四

四十五

卦策六

六百二十九

三十四

外策三

三百一十四

六十七

維策一十二 一千二百五十八 六十八

氣盈一千五百七十三 三十五

朔虛三千三百九十九 七十二

氣候圖

冬至十一月中 蚯蚓結 麋角解 水泉動

小寒十二月節 鴈北鄉 鵲始巢 雉始雊

大寒十二月中 鷄始乳 鷩鳥厲疾 水澤腹堅

立春正月節 東風解凍 蟄蟲始振 魚上冰

雨水正月中

獺祭魚

鴻鴈來

草木萌動

驚蟄二月節

桃始華

倉庚鳴

鷹化為鳩

春分二月中

玄鳥至

雷乃發聲

始電

清明三月節

桐始華

田鼠化為鴽

虹始見

穀雨三月中

萍始生

鳴鳩拂其羽

戴勝降于桑

立夏四月節

蜩蟬鳴

蚯蚓出

王瓜生

小滿四月中

苦菜秀

靡草死

小暑至

芒種五月節

蟠螳生

鵙始鳴

反舌無聲



夏至五月中

鹿角解

蜩始鳴

半夏生

小暑六月中

溫風至

蟋蟀居壁

鷹乃學習

大暑六月中

腐草為螢

土潤溽暑

大雨時行

立秋七月節

涼風至

白露降

寒蟬鳴

處暑七月中

鷹祭鳥

天地始肅

禾乃登

白露八月節

鴻雁來

玄鳥歸

羣鳥養羞

秋分八月中

雷乃收聲

蟄蟲坯戶

水始涸

寒露九月節

鴻雁來賓

雀入水為蛤

菊有黃華

霜降九月中

豺祭獸

草木黃落

蟄蟲咸俯

立冬十月節

水始冰

地始凍

雉入水為蜃

小雪十月中

虹藏不見

天氣上騰地氣下降

閉塞成冬

大雪十一月節

鶡旦不鳴

虎始交

荔挺出

爻象圖

冬至坎初六

公中孚

辟復

侯屯內

小寒坎九二

侯屯外

大夫謙

卿睽

大寒坎六三

公升

辟臨

侯小過內

立春坎六四

侯小過外

大夫蒙

卿益

雨水坎九五

公漸

辟泰

侯需內

驚蟄坎上六

侯需外

大夫隨

卿晉

春分震初九

公解

辟大壯

侯豫內

清明震六二

侯豫外

大夫訟

卿蠱

穀雨震六三

公革

辟夬

侯旅內

立夏震九四

侯旅外

大夫師

卿比

小滿震六五

公小畜

辟乾

侯大有內

芒種震上六

侯大有外

大夫家人

卿井

夏至離初九

公咸

辟姤

侯鼎內

小暑離六二

侯鼎外

大夫豐

卿渙

大暑離九三

公履

辟遯

侯恒內

立秋離九四

侯恒外

大夫節

卿同人

處暑離六五

公損

辟否

侯巽內

白露離上九

侯巽外

大夫萃

卿大畜

秋分兌初九

公賁

辟觀

侯歸妹內

寒露兌九二

侯歸妹外

大夫无妄

卿明夷

霜降兌六三

公困

辟剝

侯艮內

立冬兌九四

侯艮外

大夫既濟

卿噬嗑

小雪兌九五

公大過

辟坤

侯未濟內

大雪兌上六

侯未濟外

大夫蹇

卿頤

七十二侯

各置中節即初候也以候策累加之即次候也

六十四卦

置中氣即公卦也以卦策累加之即次卦也置候卦以外策加之即外卦也

五行用事

置四立之節而命之即春木夏火秋金冬水用事之初也置四季之節各以維策加之即土用事也

沒日

中節分五千六百二十六秒六十五已上者用減統法為有沒分通氣策以乘之氣盈而一滿統法為日用加

其氣而命之即所求沒日也

減日

常朔分朔虛已下者為減分以朔率乘之朔虛而一盈  
統法為日用加其朔而命之即所求減日也

右朴所撰欽天歷經四篇舊史亡其步發欽一篇而在  
者三篇簡略不完不足為法朴歷世既罕傳予嘗問於  
著作佐郎劉義叟義叟為予求得其本經然後朴之歷  
大備義叟好學知書史尤通於星歷嘗謂予曰前世造

歷者其法不同而多差至唐一行始以天地之中數作  
大衍歷最為精密後世善治歷者皆用其法惟寫分擬  
數而已至朴亦能自為一家朴之歷法總日躔差為盈  
縮二歷分月離為遲疾二百四十八限以考衰殺之漸  
以審朧胸而朔望正矣校赤道九限更其率數以步黃  
道使日躔有常度分黃道八節辨其內外以揆九道使  
月行如循環而二曜協矣觀天勢之升降察軌道之斜  
正以制食差而文會密矣測岳臺之中晷以辨二至之



日夜而軌漏實矣推星行之逆順伏留使舒亟有漸而五緯齊矣然不能宏深簡易而徑急是取至其所長雖聖人出不能廢也義叟之言蓋如此覽者得以考焉



五代史卷五十八

五代史卷五十八考證

司天考第一黃道正交月度統法通朔交定日○統字

上南本有經字

五代史卷五十八考證

# 欽定四庫全書

史部

五代史卷

五十九至  
六十二

詳校官編修臣黃壽齡

洗馬臣王坦修覆勘

覆校官中書臣龔敬身

校對官監丞臣張曾炳

謄錄貢生臣張丹崑

欽定四庫全書

五代史卷五十九

歐陽

陽

修

撰

司天考第二

昔孔子作春秋而天人備予述本紀書人而不書天子何敢異於聖人哉其文雖異其意一也自堯舜三代以來莫不稱天以舉事孔子刪詩書不去也蓋聖人不絕天於人亦不以天參人絕天於人則天道廢以天參人

則人事惑故常存而不究也春秋雖書日食星變之類孔子未嘗道其所以然者故其弟子之徒莫得有所述於後世也然則天果與於人乎果不與於人乎曰天吾不知質諸聖人之言可也易曰天道虧盈而益謙地道變盈而流謙鬼神害盈而福謙人道惡盈而好謙此聖人極論天人之際最詳而明者也其於天地鬼神以不可知為言其可知者人而已夫日中則是盛衰必復天吾不知吾見其虧益於物者矣草木之成者變而衰落

之物之下者進而流行之地吾不知吾見其變流於物者矣人之貪滿者多禍其守約者多福鬼神吾不知吾見人之禍福者矣天地鬼神不可知其心則因其著於物者以測之故據其迹之可見者以為言曰虧益曰變流曰害福若人則可知者故直言其情曰好惡其知與不知異辭也參而會之與人無以異也其果與於人乎不與於人乎則所不知也以其不可知故常尊而遠之以其與人無所異也則修吾人事而已人事者天意也

書曰天視自我民視天聽自我民聽未有人心悅於下而天意怒於上者未有人理逆於下而天道順於上者然則王者君天下子生民布德行政以順人心是之謂奉天至於三辰五星常動而不息不能無盈縮差忒之變而占之有中有不中不可以為常者有司之事也本紀所述人君行事詳矣其興亡治亂可以見至於三辰五星逆順變見有司之所占者故以其官誌之以備司天之所考嗚呼聖人既沒而異端起自秦漢以來學者



惑於災異矣天文五行之說不勝其繁也予之所述不  
得不異乎春秋也考者可以知焉

開平二年夏四月辛丑熒惑犯上將甲寅地震四年十  
二月庚午月有食之乾化元年春正月丙戌朔日有食  
之五月客星犯帝座二年正月丙申熒惑犯房第二星  
戊申月犯心大星四月甲寅月掩心大星壬申彗出于  
張甲戌彗出靈臺同光元年十月辛未朔日有食之二  
年六月甲申衆星交流丙戌衆星交流八月戊子熒惑

犯星十一月丁巳地震三年三月丙申熒惑犯上相戊申月有食之四月癸亥朔日有食之甲子熒惑犯左執法六月甲子太白晝見丙寅歲犯右執法己巳太白晝見庚寅衆星流自二更盡三更而止辛卯衆小星流于西南九月甲辰月有食之丁未天狗墮有聲如雷野雉皆雊丙辰太白歲相犯十一月甲寅地震天成元年三月惡星入天庫流星犯天樞四月庚戌金犯積尸六月乙未衆小星交流七月己未月犯太白庚申太白晝見

乙丑月入南斗魁八月乙酉朔日有食之癸卯太白犯  
心大星乙巳月犯五諸侯辛亥熒惑犯上將九月丁巳  
月犯心大星巳巳月犯昴庚午熒惑犯右執法巳卯熒  
惑犯左執法十月戊子熒惑犯上相巳丑至于庚子日  
月赤而無光丙午月掩左執法十一月丁丑月暈匝火  
木戊寅月犯金木土十二月戊戌熒惑犯氐乙巳月掩  
庶子二年正月甲戌熒惑歲相犯二月辛卯熒惑犯鍵  
閉三月戊午月掩鬼庚申衆小星流于西北巳巳熒惑

犯上相乙亥月入羽林四月丁亥月犯右執法癸卯月  
入羽林六月辛丑熒惑犯房八月己卯朔日有食之庚  
子月犯五諸侯九月壬子歲犯房庚申月入羽林壬申  
月犯上將十月壬午月犯五諸侯癸未地震十一月乙  
卯月入羽林辛未地震壬申地震十二月癸未地震三  
年春正月壬申金火合于奎二月丁丑朔日有食之四  
月丁酉月犯五諸侯五月丁巳月掩房距星六月乙酉  
月掩心庶子癸巳月入羽林自正月至于月宗人宗

正搖不止七月乙卯月入南斗魁閏八月癸卯朔熒惑  
犯上將戊申月犯南斗乙卯熒惑犯右執法庚戌太白  
犯右執法九月庚辰土木合于箕辛巳金火合于軫十  
月庚午彗出西南十一月戊子月掩軒轅大星乙未太  
白犯鎮月掩房十二月壬寅朔熒惑犯房金木相犯于  
斗乙卯月有食之四年正月癸巳月入南斗魁二月辛  
酉月及火土合于斗三月壬辰歲犯牛六月癸丑月有  
食之既七月丁丑月入南斗九月丙子熒惑入哭星十

二月庚戌月有食之既長興元年六月癸巳朔日有食  
之乙卯太白犯天鐫八月己亥月犯南斗乙卯月犯積  
尸九月辛酉朔衆小星交流而隕十一月壬戌熒惑犯  
氐十二月丙辰熒惑犯天江二年正月乙亥太白犯羽  
林庚辰月犯心距星二月丁未月犯房四月甲寅熒惑  
犯羽林五月癸亥太白晝見閏五月乙巳歲晝見六月  
壬午地震八月丁巳辰犯端門九月丙戌衆星交流丁  
亥衆星交流而隕戊子太白晝見丁未雷十一月甲申

朔日有食之丙戌太白犯鍵三年四月庚辰熒惑犯積  
尸九月庚寅太白犯哭星十月壬申太白晝見十一月  
己亥太白犯壁壘四年五月癸卯大白晝見六月庚午  
衆星交流七月乙亥朔衆星交流九月辛巳太白犯右  
執法乙未雷應順元年二月丁酉衆星流于西北四月  
戊寅白虹貫日是月改元清泰清泰元年五月己未太  
白晝見六月甲戌太白犯右執法九月辛丑衆星交流  
壬寅雨雹于京師冬十一月丁未彗出虛危掃天壘及

哭星天福元年三月壬子熒惑犯積尸二年正月乙卯朔日有食之七月丙寅日有食之十二月己卯朔日有白虹二三年三月壬子日有白虹二五月壬子月犯上將四年四月辛巳太白犯東井北轅甲午太白犯五諸侯五月丁未太白犯輿鬼中星七月庚子朔日有食之九月癸未月掩畢五年十一月丁丑日有食之六年八月辛卯太白犯軒轅九月己卯熒惑犯上將壬子彗出于西掃天市垣八年四月戊申朔日有食之八月丙子



熒惑犯右掖十月庚戌彗出東方丙辰熒惑犯進賢十一月庚子月犯房開運元年二月辛亥日有白虹二壬戌太白犯昴己巳熒惑犯天鐮三月戊子日有食之四月丁巳太白犯五諸侯七月庚辰月犯熒惑壬午月入南斗甲申太白犯東井八月甲辰熒惑入南斗九月庚午朔日有食之丙子月入南斗乙酉月食昴丙戌月有食之庚寅月犯五諸侯十月癸卯月入南斗十一月辛巳月犯昴十二月癸丑太白犯辰二年七月乙未朔月

犯角壬寅月犯心前大星庚戌歲犯井鉞八月甲子朔  
日有食之甲戌歲犯東井九月己酉月犯昴甲寅太白  
犯南斗魁十一月甲午朔太白犯哭星癸丑月掩角距  
星戊午月犯心後星三年二月壬戌朔日有食之天福  
十二年四月丙子太白晝見十月己丑太白犯亢距星  
十一月壬子雨木冰辛酉雨木冰壬戌月犯昴癸酉雨  
木冰乙亥月掩心大星己卯月犯南斗十二月乙未月  
有食之乾祐元年四月甲午月犯南斗六月戊寅朔日

有食之乙未月入南斗七月甲寅月掩心庶子星八月  
乙酉鎮犯太微西垣戊戌歲犯右執法九月丁卯月掩  
鬼十月丁丑歲犯左執法二年四月壬午太白晝見六  
月癸酉朔日有食之壬午月犯心丙戌月犯天關八月  
乙亥月犯房次將九月壬寅太白犯右執法庚戌太白  
犯鎮辛酉鎮犯右執法丁卯太白犯歲鎮自元年八月  
己丑入太微垣犯上將執法內屏謁者勾己往來至是  
歲十一月辛亥而出四百四十三日甲寅月犯昴三年

二月甲戌月犯昴六月乙卯鎮犯左掖七月甲申熒惑  
犯司怪八月癸卯太白犯房庚戌太白犯心大星十月  
辛酉月犯心大星太白犯木十一月甲子朔日有食之  
廣順元年二月丁巳歲犯咸池己未熒惑犯五諸侯三  
月甲子歲守心己卯熒惑犯鬼壬午熒惑犯天戶四月  
甲午歲犯鉤鈴二年二月庚寅太白經天四月丙戌朔  
日有食之七月乙丑熒惑犯井鉞八月乙未熒惑犯天  
鐔九月辛酉熒惑犯鬼庚辰太白掩右執法十月壬辰

太乙犯進賢三年四月乙丑熒惑犯靈臺五月辛巳熒惑犯上將丙申熒惑犯右執法七月乙酉月犯房十二月戊申雨木冰顯德元年正月庚寅有大星墜有聲如雷牛馬皆逸京城以為曉鼓皆伐鼓以應之三年正月壬戌有星孛于參十二月庚午白虹貫日癸酉日有食之

五代亂世文字不完而史官所記亦有詳略其日月五星之變大者如此至於氣祲之象出沒銷散不常尤難

占據而五代之際日有冠珥環暈纓紐負抱戴履背氣  
十日之中常七八其繁不可以勝書而背氣尤多天福  
八年正月丙戌黃霧四塞九年正月乙未大霧中二白  
虹相偶四月庚戌大霧中有蒼白二虹廣順元年十一  
月甲子白虹竟天此其尤異者也至於吳火出楊林江  
水中閩天雨豆之類皆非中國耳目所及者不可得而  
悉書矣

五代史卷五十九

五代史卷五十九考證

司天考第二三年三月壬子日有白虹二五月壬子月  
犯上將○此天福三年也張希崇傳有天福三年月  
掩畢口大星希崇嘆曰畢口大星邊將也我其當之  
乎本卷不知何以不書

丁亥太白犯歲鎮自元年八月己丑入太微垣犯上將  
執法內屏謁者勾己往來至是歲十一月辛亥而出  
四百四十三日○四百四十三日南本作小注

五代史卷五十九考證